

■ TRIBUNA POLITICA

NA ad ina cassa da malsauns unitara

Ina midada dal sistem chaschuna custs pli auts

DA MARTIN SCHMID,
CUSSEGLIER DALS CHANTUNS

Mardi passà ha il cussegl dals chantuns refusà cleramain cun 28 cunter 13 vuschs l'iniziativa per introducir ina cassa da malsauns unitara. A mes avis cun raschun. Cuntrari a las pretaisas dals iniziants ch'ina naziunalisaziun dal sector da la sanadad sbassass ils custs da sanadad ed uschia era las premias capitass il cuntrari. Gist era chantuns cun premias da la cassa da malsauns bassas ristgassan da stuair pajar dapli. Era sch'ils assicurads sa grittentan mintgant da las cassas da malsauns e da lur reclamas, che importan però mo 0,3 pertschient da lur expensas totalas, n'è quai nagina raschun objectiva da midar cumplettamain in sistem cumprovà.

Oz concorrenzeschan las cassas da malsauns ina l'otra. Ellas ston far lur incumbensas a moda uschè effizienta sco pussai-vel. Ina statistica cumprova ch'ils custs d'administraziun da las cassas da malsaunas èn en media cun 5,5 pertschient bler pli bass che quels dad assicuranzas statalas sco la Suva, l'AVS, l'AI ubain l'AD. Ina cassa da malsaunas unitara fa-



schess da nus assicurads patients che fissan exposts senza alternativadas ad in monopol dal stadi.

Jau sun era persvas che l'introducziun d'in monopol d'assicuranzas da malsauns avess fermas consequenzas negativas per la qualitad dal provediment da la sanadad svizzer. Oz vegnan las cassas da malsauns intimadas da porcher models d'assicuranzas novs ed innovativs nua ch'ils basegns da las clientas e dals clients stattan en il center. Sch'ellas tralascian da far talas purschidas van las assicuradas ed ils assicurads tar la concorrenza. Uschia ston las cassas meglierar cuntinuadamain la qualitad da lur servis e da lur offerta e tuttina tegnair bass lur agens custs.

Sch'i dess mo pli ina suletta cassa da malsauns gronda avess quai er il dischavantatg essenzial ch'ils ospitals, ils medis e las apotecas fissan mo pli confruntads cun in monopolist. As imaginai ina giada las tractativas davart las tariffas sut questas cundiziuns da partenza? Il monopolist pudess dictar ils pretschs ed impedir – gist er en vista ad in augment dals custs – il svilup ulteriur dal sector da la sanadad.

Ultra da quai chaschunas ina midada dal sistem da cassas da malsauns ozendi liberal ad in sistem monopolistic custs da milliardas. L'infrastructura dal sistem verdetenta na pudess betg pli vegnir utilisada ed i fiss necessari da crear in'infrastructura d'EED statale. Igl è previsibel ch'ils dus systems stuessan funcionar onns a la lunga parallelamain per garantir il provediment durant quest temp transitoric. Ultra da quai laschan ils projects d'informatica malreussids sin plaun federal sminar pauc dal bun. I n'è betg necessari da s'exponer a talas ristgas e perquai èsi da refusar l'experiment d'ina cassa da malsauns unitara.